

სახალხო დღესასწაული "გორის დღე 2023" მრავალფეროვანი ღონისძიებებით აღინიშნა

08 ოქტომბერი 2023

საზეიმო ღონისძიებას შიდა ქართლის სახელმწიფო რწმუნებული მიხეილ შაყულაშვილი გორის მუნიციპალიტეტის მერთან ვლადიმერ ხინჩეგაშვილთან და ადგილობრივი თვითმმართველობის წარმომადგენლებთან ერთად დაესწრო. ღონისძიებაზე იმყოფებოდნენ გორთან დამეგობრებული ქალაქების, ლიეტუვის ქალაქ უტენასა და პოლონეთის ქალაქ ოჟიშის წარმომადგენლები.

გორელებს და ქალაქის სტუმრებს საშუალება ჰქონდათ ადგილზე წარმოებული პროდუქცია დაეთვალიერებინათ, დაეგემოვნებინათ და ამავდროულად, შეეძინათ. გარდა ამისა, მოენცო გორის მუნიციპალიტეტის სოფლების კუთხეები, სადაც გაცოცხლებული იყო ადგილობრივი კულტურა, სამზარეულო და ტრადიციები.

მოედანზე შეკრებილ სტუმრებს სახელმწიფო რწმუნებულმა "გორის დღე" მიულოცა. "ჩემო ძვირფასო გორელებო და ჩვენი ქალაქის სტუმრებო, მინდა მოგესალმოდეთ სამხარეო ადმინისტრაციის სახელით და მოგილოცოთ ქალაქის დღესასწაული. ჩემთვის პატივია დღეს თქვენთან ერთად ყოფნა. ჩვენს ქალაქს დიდი ისტორია აქვს, ოდითგანვე იყო და არის კულტურულ საგანმანათლებლო კერა და ქვეყნის მასშტაბით უმნიშვნელოვანესი სტრატეგიული ცენტრი. გორი ნამდვილად განორჩეულია საინტერესო ადამიანებითა და რა თქმა უნდა, მნიშვნელოვანი ტურისტული ადგილებით. ჩვენ, როგორც ცენტრალური, ისე ადგილობრივი ხელისუფლება გავაგრძელებთ ყოველდღიურ შრომას, იმისთვის რომ ჩვენი ქალაქი იყოს ერთ-ერთი მოწინავე, ეკონომიკურად განვითარებული და გამორჩეული ქალაქი. კიდევ ერთხელ გილოცავთ ქალაქის დღესასწაულს." - აღნიშნა მიხეილ შაყულაშვილმა.

შეკრებილებს, ასევე სიტყვით მიმართეს და მიულოცეს გორის მუნიციპალიტეტის მერმა ვლადიმერ ხინჩეგაშვილმა, გორისა და კასპის მაჟორიტარმა დეპუტატმა გიორგი სოსიაშვილმა და გორის მუნიციპალიტეტის საკრებულოს თავმჯდომარემ დავით რაზმაძემ.

ღონისძიება გალა კონცერტით დასრულდა, მაყურებლის წინაშე ჯგუფები "ქიმერა", Soft Wave და "მგზავრები" წარსდგნენ.